

摘藻堂四庫全書薈要

集部

欽定四庫全書薈要卷一萬四千一百四十六

集部

小畜集卷二十一

宋 王禹偁 撰

表

為宰臣上尊號表

為宰臣謝御書錢樣表

謝賜御製逍遙咏秘藏詮表

為宰臣謝賜御製歌詩表

為宰臣謝新雕三史表

謝賜御草書詩表

謝御製重午詩表

陳情表

謝免和御製元日除夜詩表

賀正表

謝歷日表

進端拱箴表

謝賜御製月詩表

謝賜御書字樣錢表

單州謝上表

進乾明節祝聖詩表

謝衣襖表

滁州謝上表

謝加朝散大夫表

謝賜聖惠方表

為宰臣上尊號表

内外文武臣寮具官趙某等言今月二十一日共干天
聽別上尊名奉宸翰以未俞慮精誠而不至戴天就日
猶懸億兆之心伏閣叩閤寧避再三之黷謝臣等聞運
行四時者惟天之大照臨萬國者惟日之明天不宰其
玄功而有蒼旻之號日不耀於陽德而有畏愛之名是
以居廣大而罔辭處貞明而弗讓蓋功德著乎上而名
號隨于下矣前王後聖茂實英聲取譬于茲其則不遠
伏惟皇帝陛下繼天而王如日之昇靜則垂堯舜之衣

裳動則伏武湯之旄鉞明堂制禮走玉帛於萬方宣室
崇儒煥文章於三代候氣而八風從律陳詩而萬物由
庾既理定以功成尚宵衣而旰食早以兆民愛戴羣后
推崇率由舊章共上徽號陛下讓不得已俯而從之雖
百姓同歡方諧歸美而一人善下終恐近名昨者法天
道以流謙敷王言而如綽謂大道不器何假先天之言
謂聖人無名豈須惟睿之說盡除尊號頗駭羣情臣等
奉詔靡遑再章請復陛下過防滿假終未允俞守謙卦

之六久動而無悔去湯書之七號卑不可踰遂使中外
包羞軍民沮色既難移於成命乃別獻於嘉猷共傾天
誘之衷用紀日新之德著龜叶吉蠻貊同文咸願聽卑
以期得請陛下特迂鳳藻猶避鴻名固愈振於謙光奈
重違於人欲而况皇王顯號今古彝章上則尊列聖之
貽謀光輝七廟下則稱庶邦之係望威服八荒凡在含
生共觀休烈豈可執勞謙之小節廢立極之大名居軒
昊之至尊慕巢由之獨行此臣等之所未諭也陛下之

所不取也臣等不勝大願敢固請上尊號曰法天崇道
文武皇帝庶得將順謙冲之日惟新徽懿之名免使聖
明有茲闕典跼天蹐地罔敢自安碎首糜軀期于必遂
臣等無任區區懇迫之至

為宰臣謝御書錢樣表

臣等伏蒙聖慈賜御書三體字樣錢各一貫文者五銖
新樣貨泉將布於人間三體成文筆札互彰於天縱出
爐冶而首蒙頒賜望冕旒而共積兢榮伏惟尊號皇帝

陛下道極至元學探衆妙宸居多暇書九府之錢刀御
筆搞華奪三辰之文彩盡真草隸行之法在方員肉好
之中通流將遍於溥天固殊當百錫賚先霑於近位其
數且千臣等傳翫為榮收藏至寶荷天光而悚惕對聖
作以兢慙臣無任

謝賜御製逍遙咏秘藏詮表

臣等言伏蒙聖慈賜臣等御製秘藏詮逍遙詠共四十
一卷者伏以竺乾之教所以祛色相而示真如老氏之

書所以去滋章而務清淨大不過四句偈多不出五千
言始則殊途而同歸終則枝分而派別洎乎演三乘於
貝葉文字漸多編三洞於瑤函筌蹄逾遠縱人十而已
百奈暮四以朝三自非上聖之才孰立不刊之典發揮
教法允屬文明伏惟聖號皇帝陛下思妙玄沙心遊赤
水因民設教自天比崇知幾其神建皇王之有極恭默
思道念釋老之多岐于是詮註微言詠謌至道撮其樞
要闢戶牖于法門塞其菁英芟蕭稂於玄圃示萬幾之

多暇表三教之精通定可以指迷悞於羣生扇穆清於四海豈比夫劉莊蕭衍但多佞佛之心漢武秦皇空作求仙之術自合鐫諸玉簡藏在名山將日月以同懸與鬼神而爭奧傳于不朽垂之無窮臣等謬列詞臣躬承聖教被堯天之雲霧已覺濡身聽舜殿之絃歌共知忘味謹當披持讀誦抃舞歡呼少遵善誘之心庶助無為之化臣無任

為宰臣謝賜御製歌詩表

臣等伏蒙聖慈宣賜喜雨歌詩共三首者天時旱暵聖
慮焦勞玄穹忽降於霽霓睿藻遂形於歌詠首蒙宣示
共極歡榮伏惟尊號皇帝陛下軫念三農精心六義自
春徂夏稍致愆陽以日繫時不忘善禱詔近臣而遍走
羣望御便殿而親錄繯囚聖感玄通天心昭答潛驅屏
翳舒張東岱之雲暗使豐隆撾擊南山之鼓連宵泛灑
率土昭蘇早稼勃興豐年可望緣至情而有作奮御筆
以成篇帝庸作歌高視康哉之詠上以風化遠追皇矣

之詩燦然三章誕敷四海深形教誨特有宣傳台衡宸
扆之銘彼何膚淺白雪陽春之句空銜清新臣等救旱
功微賡歌調下鏤于肌骨敢忘作誠之詞播在管絃願
導移風之德臣無任

為宰臣謝新雕三史表

臣某等言伏蒙聖慈賜臣等新印本三史書各一部者
伏以先帝好文校讐三史諸儒論議綿歷兩朝模印方
行頒宣首及中謝伏惟尊號皇帝陛下心存稽古志在奉

先念五帝三王之書具存道德思列國兩漢之事可鑒
興亡覩真本之初成先近臣而受賜欲俾詳觀理亂起
發昏蒙臣等素匪知書仰承善誘敢不服勤舊史少副
聖懷庶竊慕於格言或有裨於大政臣等無任

謝賜御草書詩表

臣某言今月五日伏蒙聖慈賜臣紅綾上御草書趙嘏
南亭絕句詩一首絳綃半幅霞舒舞鵠之紋宸翰三行
雲遶迴鸞之勢天恩曲被凡目榮觀佩服戰兢神魂飛

越謝中伏惟尊號皇帝陛下書窮八法學洞九流英斷睿

謨運玄功而多暇飛文染翰縱草聖以為娛閒裁浙水
之綾爰寫渭南之句宮中刀尺剪雲霧於赤城筆下風
雷走龍蛇於碧落遍令中使宣賜近臣豈期瑣材亦預
宸眷捧持失次傳翫增輝忻千載之遭逢極一時之榮
遇讀盡二十八字列宿韜光宣來三十六宮天香尚在
豈止藏於篋笥亦將傳付子孫堪笑二王非墨妙筆精
之作如逢伯禹得金簡玉字之書感恩空效於涕洟受

賜更銘於肌骨臣無任感天荷聖激切屏營之至

謝御製重午詩表

臣某等言伏蒙聖慈宣賜御製七言四韻重午詩一首者天有四時成聖功也八節所以宣其氣詩有六義繫王化也二南所以變其風至若運陰陽亭毒之功達雅頌盛衰之理不失其正斯惟聖人

謝中

伏惟尊號皇帝陛

下運應一千啓昇平之嘉會節當重午樂長養之元功形于詠歌播作詩什特令中使宣示詞臣降鳳閣以光

輝播魚須而拊舞仰窺首句如當帝舜之熏風載咏卒
章仍念屈原之貞魄教化以被忠邪以分又何止述浴
蘭懸艾之文逞白雪陽春之麗而已哉臣等職叨掌誥
才謝言詩獻尚書而諷諫無聞徒經嘉節學離騷而淵
深罕究但拜宸章願揚治世之音永作傳家之寶臣無
任戴天荷聖歡呼拊蹈之至

陳情表

臣某言臣聞改過自新人臣之晚節棄瑕責效王者之

舊章

中謝

伏念臣近自冗員再叨諫署秋蘭解珮重呼澤

畔之魂紅藥裁詩不望禁中之樹固當老於小諫日赴

常叅其如親寄解梁身趣魏闕四海無立錫之地一家

有懸磬之憂以至僕馬龍鍾雜于工祝弟兄分散迫于

饑寒若非內受職名賜之實俸外求差使以救食貧則

曷以養高堂垂白之親備上國燃金之費望雲就日非

無戀闕之心玉粒桂薪未有住京之計伏望尊號皇帝

陛下念臣過而能改進不因人或西垣再命於演綸或

東魯且令於承乏唯中外之二任繫君親之一言干冒宸嚴臣無任僭越兢憂惴惴待罪之至

謝免和御製元日除夜詩表

臣等言伏蒙聖慈特降御製元日除夜詩四首仍令和來臣等尋時連狀謝罪乞免和今月七日伏奉恩旨特賜俞允者聖文絕唱天道聽卑雖違善誘之心幸獲知難之請伏惟尊號皇帝陛下五行為質六義游心樂天地之玄功奮皇王之睿藻筆無停綴夜乃未央煥乎四

章降於三館耀日月星辰之彩發金石絲竹之音思入

杳冥乾坤無以逃其數辭包造化鬼神不能隱乎情其

元日之句也藻繪王春悅萬物之資始其除夜之句也

發揮天吏運四序之成功固宜隨厯數而頒於華夷與

法令而懸於象魏俾夫薰絃播奏散為化下之風蒼玉

雕鐫秘作升中之典至若周滿黃竹之詠漢高大風之

歌唐太宗守歲之詩陳叔寶初年之作義皆無取事不

足徵又若除夜藏鉤正朝放雀真為兒戲豈近皇猷遍

數前王實多慙德臣等文館待罪朝行具員幸觀四始
之根源徒荷千年之際遇然而對燭龍之銜耀難炫螢
光當鳳彩之來儀須藏雉尾共思閣筆同樹降旗方傾
窘蹙之誠果降矜容之命豐隆門下免為聚響之蚊莊
叟山中甘作不鳴之鴈臣等無任感天荷聖激切屏營
之至

賀正表

臣某言伏以元正首祚景福惟新數冀英於堯堦初生

一葉獻椒花於漢殿齊列千官式彰負宸之尊大祝如
山之壽伏惟尊號皇帝陛下業隆三代道冠百王和玉
燭以授時玄功克著振金鈴而徇路春令初行當三元
資始之期見萬國會同之盛方物充庭而麋至上公獻
壽以鳧趨日照冕旒覩垂衣之肅穆風和象魏陳懸法
之威儀詎遺率土之濱同樂履端之候膺乾納祐與天
齊休臣濫奉朝恩叨權郡印思預華封之祝方遠彤庭
新頒義氏之書空驚素髮但荷發生之德莫酬煦育之

私臣無任祝聖戴天抃蹈歡呼之至

謝歷日表

臣某言今月四日進奏院遞到宣頭一道伏蒙聖慈賜臣至道二年新歷日一道者王春肇啓日官爰舉於舊章帝命遐宣守土各頒於新歷臣某中臣聞天道無私

所以運行寒暑聖人有作所以恭授民時常令率土之濱共樂同文之化伏惟尊號皇帝陛下五行爲質萬國咸寧星辰即序於堯天風雨弗迷於舜麓御明堂之一

十二位克正陰陽運璿璣而三百六旬無差晷刻煥乎
正朔被于華夷臣謬典魚符欣開鳳厯以時以日敢忘
匪懈之心卜世卜年更仰無疆之祚伏限郡政不獲奔
詣闕庭無任感天荷聖激切屏營之至

進端拱箴表

臣某言臣聞宣尼立教陳五諫以訓民天子設官命七
人而庭諍欲嘉言之罔伏致盛德之日新謝中伏惟尊號
皇帝陛下志在任賢動必師古大開言路精擇諫臣改

拾遺補闕之名設司諫正言之位必須端士方稱美官
臣且何人亦當此任三月中伏奉明詔用訓庶僚於中
兩省之班行有異百官之督責必容謬誤無取因循是
時臣方議迎親已諧入告陛下矜其貧乏錫以緡錢恩
庠曲被於一家用度有充於千里況臣曾為縣吏每督
民租為尺布斗粟之逋行減耳鞭刑之法因知府庫皆
出生靈空有淚以感恩慙無功而受賜洎再趨象魏時
見冕旒猥塵書殿之資久蠹大官之膳曾無績効空玷

清華且官在諫垣未嘗有一言裨補職當史筆未嘗有一字刊修語所謂飽食終日無所用心者臣之謂矣思欲舉諫諍之職言朝廷之事則陛下聖德昭被神功著明四輔無私而秉大鈞百姓不知而歸至化君何事哉臣何言哉然而安不忘危理不忘亂靡不有初鮮克有終古聖賢之深旨也故夏后有盤盂之銘周王有几杖之誠敢徵斯義用導愚衷臣又嘗讀唐史見貞觀中張蘊古上大寶箴辭理切直太宗深加稱賞焉臣雖不才

願繼其美謹昧死撰端拱箴一首固不足裨益明聖萬分之一亦臣之舉職也隨表詣東上閣門跪進以聞干冒宸嚴臣無任僭越待罪之至

謝賜御製月詩表

臣某等言今月十六日伏蒙聖慈宣示中秋月五七言詩各一首仍令依韻和來者月盈三五明天道之無差運偶一千見聖人之有作雖聽賡歌之命終降寡和之詞傳既為榮捧持失次伏惟尊號皇帝陛下精心六義

思若湧泉銳意萬幾居多暇日當中秋之屆候翫素月
之流空罷觀乙夜之書乃吟清夜載覩如圭之狀思繼
白圭燦乎二章大哉四始頒于近位得遂榮觀雖酌海
窺天罔知涯涘而君唱臣和親奉德音強率謏聞虔遵
睿旨効星辰之北拱徒竭丹心誦烏鵲之南飛終慙雅
詠顧瑕疵之難掩諒尤悔以何逃臣等無任謌詩樂聖
榮懼激切之至

謝賜御書字樣錢表

臣某等今月二十三日於學士院分賜得御書三般字樣淳化元寶錢者洪鑪新樣通行將遍於萬方御筆摛華神妙互分於八體頒宣非次傳翫知榮謝中伏惟尊號皇帝陛下留意貨泉精心筆札書紀年之大號用煥錢神逞上聖之多才爰彰墨妙盡返鵠迴鸞之法掩天龍地馬之名莊山厯山之金可齊重寶開元乾元之字莫比神蹤將大濟於兆民仍分霑於兩制臣等名慙夷甫才謝魯褒實趙囊而空荷君恩探禹穴而難窮聖作周

太公之園法自合包羞歐率更之筆精從茲掃地永言
感遇空極兢榮臣等無任

單州謝上表

臣某言今月九日曹州進奏院遞到勅一道伏蒙聖慈
就差知單州軍州事兼賜錢三百貫文祇荷寵榮不任
感懼臣已於今月十七日到本州上訖乍別天庭初臨
郡印錫賚頗厚恩榮實多謝中伏念臣本乏才名素無門
地徒偶文明之運濫登俊造之科升朝便忝於諫垣効

職仍叨於綸閣常罹罪譴永合棄捐仰穹旻而方類戴
盆遇慶赦而遽收墜履官復兩省之列職居三館之先
俸厚於他司班清於庶品固合優游仙館耽翫群書常
依日月之光時貢芻蕘之說詎惟卒歲亦可終身昨以
臣父將作監丞致仕某足疾嬰纏年光遲暮向因謫宦
深入窮山常恐此生不歸故里自叨赴闕頗更思鄉蓋
為衰羸動多悲感有孫兒不識面目有子壻未接笑言
分俸則桂玉不充聚族則京師難住近聞館殿亦有遣

差頻發家書令求外任遂瀝事親之懇以干孝治之朝
伏蒙尊號皇帝陛下義在從人恩推養老假之符竹惠
以緡錢居二千石之權已為望外受三十萬之賜實自
宸衷感深而淚濕詔書戀極而魂飛帝闕即時赴郡不
日迎親本州以臣叨奉新恩言承舊例亦將鼓樂遠出
郊垌臣先以文書並令止絕蓋以壠麥未秀村民尚饑
當帝王盱食之時非長吏自娛之日庶幾率下不是近
名况臣早忝掖垣每親旒宸備熟憂勤之旨飽聞淳儉

之風足以宣揚聖猷訓導屬吏此外則詳評案牘精究簿書雖管庫以必親庶狴牢而無枉幸逃官謗用報聖知且念親民之官自古所重凡今共理亦曰難才張齊賢罷自台司止知京兆辛仲甫出從叅政方蒞宛丘雖小大之不同在郡國而無異唯臣此任最是殊恩十一年前始為成武主簿九重天上曾是制誥舍人望舊官而雖隔雲泥過故邑而亦為榮遇所恨者忽離侍從莫遂朝辭實非臣心輕去輦轂但以臣父苦念丘樊慰懷

土之心晨昏有遂望拱辰之列涕泗無從伏惟陛下少
減焦勞俯加頤養至于堯水湯旱歷數之常文丹浦青
丘征伐之彛事佇見斬繼遷於獨柳送蜀寇於檻車示
天下不用干戈驅域中咸歸富壽然後鳴鑾日觀降禪
云亭追蹤於七十二君探策而萬八千歲此際臣之本
郡實有行宮倘得導引皇輿掃除御路撰禮天之書冊
雖匪職司對盛德之形容敢忘歌頌臣無任

進乾明節祝聖詩表

臣某言聞天道化成分八節而運行元氣聖人降慶歷
千年而開闡洪圖誕靈既偶於嘉辰祝壽乃名於聖節
照臨之下禱願攸同臣某

中謝

竊以漢感赤龍晦雲雷於

大澤周因玄驚帶弓矢於高禩符瑞之來今古相望伏
惟尊號皇帝陛下二儀叶德九廟儲祥于時而里社方
鳴是夕而常星不見孟冬建亥愛日在房紫電繞樞式
表自天之命青雲如蓋爰標出震之期當睿聖之繼天
以乾明而命節千官上壽萬國來庭傑休兕離鏗越樂

懸之下鬼侯梅伯歡呼文陛之前駿奔競効於祝堯宴
樂且殊於在鎬臣職叨三館位列丹墀聽九奏之簫韶
欣同鳥獸獻千鐘於堯舜幸接夔龍舞蹈之餘詠歌斯
發謹上乾明節祝聖壽古詩三篇合七章章無定句篇
有小序稍殊俗態似近古風雖播在樂章慙非風雅或
歌於壽酒可代俳優冒黷冕旒臣無任

謝衣襖表

臣某言今月十七日供奉官閣門祇候景元到州伏奉

聖恩賜臣勅書一道紫歌正綿旋襴一領者臣當時與
官吏軍員將校等望闕謝恩訖遠降王人遍頒時服捧
如綸而增懼對挾纊以知榮謝中伏念臣素乏藝文猥塵
清近雖罷金鑾之職尚分銅虎之符而自移理藩宣始
踰旬浹莫著袴襦之詠空慙凋瘵之民此者伏遇尊號
皇帝陛下政在宵衣恩加露冕特有祁寒之賜俾無卒
歲之虞開緘併集於榮光宣詔更增於和氣飾之瑞獸
空傾率舞之心徵乃維鵜難免彼其之刺伏限權司郡

事不獲躬拜闕庭臣無任

滁州謝上表

臣某言奉五月九日制命伏蒙聖慈特授臣守尚書工部郎中知滁州軍州事已於六月三日到本州上訖罷直禁中臨民淮上雖離近侍猶忝正郎省已戴恩既榮且懼臣某謝伏念臣早將賤跡誤受聖知進身不自於他人立節惟遵於直道優游兩制出處八年今春召自西垣入叨內署既在深嚴之地仍當繁劇之權雖積兢

虞終無補報所宜遠貶以肅具寮伏蒙尊號皇帝陛下
曲念遭逢俯存終始止罷玉堂之職仍還粉署之資委
以專城置于近地沿流數日登陸三程諸縣豐登若無
公事一家飽暖共荷君恩處之一生實為萬足然而翰
林學士朝廷近臣陛下登位已來御前放人之後從呂
蒙正而下拜此職者止有八人臣最孤寒亦預其數言
於聖選不為不精數月之間忽然罷去衆情尚或驚駭
微臣豈不憂惶且臣在內庭一百日間五十夜次當宿

直白日又在銀臺通進司審官院封駁司勾當公事與
宋湜呂祐之閱視天下奏章審省國家詔命凡于利害
知無不為三日一到私家歸來已是薄暮先臣靈筵在
寢骨肉衰經滿身縱有交朋無暇接見不知謗議自何
而興臣拜命已來通宵自省恐是臣所賃官屋在高懷
德宅中一昨開寶皇后權厝之時便欲移出未有去處
甚不遑寧尋曾指約公人不令呵喝切恐貴僧出入中
使往還相逢之間難為顧揖按舊制自左右正言已上

謂之供奉官街衢之間除宰相外無所迴避此蓋賈誼
所謂人君如堂人臣如陛陛高則堂高者也况臣頭有
重戴身被朝章所守者國之禮容即不是臣之氣勢因
茲謝表敢達愚誠况臣粗有操修素非輕易心常知於
止足性每疾於回邪位非其人誘之以利而不徃事匪
合道逼之以死而不隨唯有上天鑒臣此志伏望陛下
思直木先伐之義考衆惡必察之言曲與保全俾伸誠
節則孤寒幸甚儒墨知歸在於小臣有何不足今則

隋岸千里堯天九重微軀或遂於生還勁節尚期於死
所臣無任

謝加朝散大夫表

臣某言今月十八日進奏院遞到勅除一道伏蒙聖慈
加臣朝散大夫者禮成大祀澤霈百僚豈期郎吏之卑
亦從大夫之後臣某黜伏念臣猥因薄技獲偶昌辰自
忝文科累叨華貫數年綸閣徒勤潤色之功百日玉堂
詎有論思之効而自身離近侍官帶責詞既別白以無

門但憂危而度日此者伏遇尊號皇帝陛下圓丘展禮
率土推恩特加五品之資俾壯一麾之任況臣早叨書
命脩見舊章每當行慶之時必考授官之限未滿二載
例增五階率以為常行之自久臣去年五月出職今年
二月加恩承奉卽陞級未崇朝散階遷陞不次必是上
由睿聖旁出僉諧以其曾作近臣不欲便全常例永言
感遇空極涕洟遂使死灰之心稍生於寒燄戴盆之首
亦見於天光誓捐微軀以答鴻造無任

謝賜聖惠方表

臣某等言今月二十五日進奏院遞到太平聖惠方并
目錄共一百一冊臣等當時望闕謝恩仍依勅命施行
訖臣等謹按洪範嚮用五福其三曰康寧威用六極其
二曰疾然則疾病之作蓋天之威沮邪康寧之集蓋天
之勸嚮邪此特立教而言姑欲驅人為善苟或飲食嗜
慾之不節陰陽寒暑之不時為札瘥為沉痾為疣贅為
疣瘍若此之類縱而弗攻委之于極非聖哲之所用心

也故醫術由是而生焉自黃帝岐伯以還作者衆矣以至叢乎無條貫浩乎無津涯思欲囊括古今派分類例叅驗百疾稽合群方惠于兆民敷乃萬國非偶大聖孰能興之臣某

中謝

伏惟尊號皇帝陛下惟睿作聖有孚惠

心包天地之大德群生罔不遂盡皇王之能事墜典罔不修謂人之未庶也制婚姻以育之謂人之未富也薄賦歛以足之謂人之未教也施道德以化之又欲使五福之康寧偏流比屋六極之疾病不加蒸民于是召良


醫考異術集自朱邸逮于紫宸幾三十年成一百軸洞
乎天人之際探諸鬼神之奧製序引以述其事為模印
以行于時大頒四方屢出萬有昔玄宗之廣濟德宗之
廣利皆叢脞眇末不足稱道尚具載史籍垂於後昆以
為莫已若也況陛下之述作功叅化源天下之惇養身
躋壽域雖復造書畫卦鑽燧播時不可同年而語矣宜
乎與日月同縣與經籍共永豈區區小郡碌碌下臣能
歌頌于聖德歟當州地居僻左路遠京師授勅數年引

頸以日累使郡吏請于有司始蒙頒宣蓋行次第而又
今冬以來天氣稍旱過始冰之候河無薄漸踰小雪之
期野無微霰頗慮瘴癘害于民人俗罕名醫病則祀鬼
分憂之任求瘼是專方虞後難獲此大賚謹當抽俸金
以市藥給官本以救人資聖祚于無疆流聖惠于不朽
盡納淮甸歸于華胥悽悽之誠如此而已臣等無任遭
時樂聖抃蹈之至

小畜集卷二十一

謹案卷二十第十六頁前五行明年同醉杏園春
刊本明訛同據別本改

第二十頁前七行連尹三邑刊本連訛建據別本
改



總校官庶吉士臣張能照

校對官中書臣金光悌

膳錄舉人臣秦朴

膳錄監生臣胡金芝

欽定四庫全書叢要

集部

小畜集卷二十三



詳校官助教臣常循

欽定四庫全書薈要卷一萬四千一百四十七

集部

小畜集卷二十二

宋 王禹偁 撰

表


賀南郊大赦表

賀冊皇太子表

謝落起復表

賀皇帝嗣位表

謝轉刑部郎中表



賀冊皇太后表

賀冊皇后表

慰上大行皇帝謚號廟號表

乞賜終南山人种放孝贈表

黃州謝上表

謝加上柱國表

謝宣賜表

起居表

賀收復益州表

賀勝捷表

揚州謝上表

請撰大行皇帝實錄表

謝弟禹圭授試銜表

賀聖駕還京表

謝加朝請大夫表

賀南郊大赦表

臣某言今月二十日降到赦書一道南郊禮畢大赦天下者臣當時集軍州官吏百姓僧道宣讀施行訖嚴父配天王者之達孝普災肆赦有國之大猷凡在羣生罔不同慶臣聞有虞尚乎德祖顓頊而宗堯周人重其先帝帝嚳而郊稷沿革之文則異祠祀之義斯同率由舊章茲曰大事雖天子必有尊也非聖人孰能行之伏惟尊號皇帝陛下司牧黎元敦崇孝治言有父也宣祖昭武皇帝積德而累功言有兄也太祖神德皇帝開基而

創業而自下武繼志守文則難化成而日用不知寅畏
而夕惕若厲故得昆蟲咸遂戎狄允懷文物聲明損益
乎三代道德仁義寢染乎萬民有是聖功推功於天地
有是聖德讓德於祖宗乃備嚴禋聿伸大報禮樂具舉
豈三年之不為玉帛載馳見四海之助祭列聖至止上
帝格思錫鴻休於無疆明大孝之不匱禮成而退天且
不違自非吉蠲之誠達于上下孝悌之至通于神明孰
能若斯其盛歟由是因純嘏之休覃雷雨之澤謂萬方

有罪于是乎釋縲紲之人謂百姓不足于是乎免逋逃
之賦照燭幽壤蕩滌瑕疵順天推恩與物更始詩不云
乎一人有慶經不云乎萬國懽心自可追三王而比崇
非止黜五伯而不用者矣臣出官內署承乏專城既不
得陪冠劍之班行俎豆之事舞抃於黃道登降於紫壇
又不得湧非烟之詞濡甘露之筆藻繪於玉冊發揮於
皇謀亦臣之不幸也然而當求治之朝居分憂之任得
不導揚兌澤訓戒齊民瘳其瘡痍浸入骨髓亦臣之大

幸也伏限郡事不獲奔詣闕庭臣無任

賀冊皇太子表

臣某言今月二十八日降到赦書一道皇太子正位儲
宮大赦天下者臣當時集軍州官吏僧道百姓宣讀施
行訖禮崇儲副澤被華夷凡在含生罔不同慶臣聞帝
王之道步驟殊途夏后所以傳家垂諸古典姬昌之為
世子載于禮經皆所以定人心而固國本矣由三代而
下實百王不刊洎乎唐室豆分梁朝草創莊宗則席未

遑暖明宗則日不暇給聯綿五姓戰伐百年重念春坊
遂成闕典我太祖神德皇帝揖讓神器司牧黎元擇上
聖之才副下民之望人神允屬獄訟攸歸伏惟尊號皇
帝陛下傳自日兄升為天子德化威服垂二十年文物
聲明盡合經義禮樂征伐不自諸侯始求主鬯之親用
正副君之位斯孟軻所謂天與賢則與賢天與子則與
子者也伏以皇太子生知忠孝性稟溫文允符當璧之
祥宜正撫軍之重筮龜叶吉簡冊增輝而又舉游雷之

聲因而作解導沙河之潤用以滌瑕必由舊章降此大
賚綸綍四出狴牢一空率土普天不勝慶幸臣出官禁
署承乏方州目不覩朝廷之儀手不當文翰之職雖違
素望實偶昌期伏限郡政不獲奔詣天闕臣無任

謝落起復表

臣某言今月五日進奏院遞到敕牒官告各一道蒙恩
落起復授臣依前尚書工部郎中知揚州軍州事仍放
朝謝者喪紀爰終朝恩遽至泣血罔極悼心失圖伏以

三年之喪百王不易墨線急用本因將帥之臣腰經從
公罔叶春秋之義臣頃居近職方執通喪斷恩勉副於
鴻私達禮重違於素志涓埃無効空增覲冒之顏日月
有期俄卒禪祥之制此者伏蒙尊號皇帝陛下舉其舊
典推以新恩俾除抑奪之名曲盡哀榮之禮援琴切切
痛豈忘於終天珮玉鏘鏘班尚遙於就日伏限權司藩
服不獲奔詣闕庭臣無任

賀皇帝嗣位表

臣某言伏奉四月一日赦書皇帝陛下虔膺顧命嗣守
鴻圖人神有依華夏同慶伏惟陛下奉先思孝克已歸
仁承列聖之貽謀作兆民之司牧重輪繼大明之照光
被遐陬少海成百谷之王澤流品彙肆赦渙汗萬邦底
寧臣逮事先朝嘗叨內署薦逢聖日權守外藩不獲蹈
舞玉階無任抃躍屏營之至

謝轉刑部郎中表

臣某言今月六日進奏院遞到勅牒一道官告一通伏

蒙聖慈特授臣尚書刑部郎中散官勲賜如故仍放朝謝者聖澤大賚郎曹序遷聞命若驚省躬知幸伏念臣頃因薄技逮事先朝誤記姓名過有獎擢兩知制誥一入翰林報國之功雖無績効事君之道粗守貞方虛名既高忌才者衆直道難進黜官亦多始貶商於實因執法後出滁上莫知罪名大行皇帝漸察非辜移領大郡方且精求民瘼少報皇恩期牽復于詞臣再發揮於王命不圖上玄降禍先帝登遐奉諱之辰號天罔極不得

趨朝夕之臨無以為臣子之心淚如綆縻悲入骨髓伏
遇皇帝陛下祇奉顧命欽承慶基荼蓼之情既遵于易
月蓼蕭之澤遂洽於溥天爰自起曹陞于憲部望金鑾
之殿誠隔煙霄入白雲之司亦非冗散得不恪居官次
虔奉詔條諭淮海之遺民識朝廷之新命無汲黯積薪
之嘆有子牟戀闕之心感慨舊思追惟往事西陵目斷
泣血難收東海日昇傾心更切伏限權司藩服不獲拜
賜玉堦臣無任感天荷聖激切屏營之至

賀冊皇太后表

臣某言伏覩四月一日制書冊皇太后禮畢者子道大
備母儀有光伏念皇太后德配先朝功存內治遇坤之
泰叶易象之休徵在河之洲動詩人之雅詠克昌聖嗣
續服寶圖爰旌十亂之功乃正萬邦之母祇膺玉冊誕
受尊稱舜孝蒸蒸漢儀穆穆問安侍膳載趨長樂之宮
含飴弄孫永鎮顯親之殿臣限拘官守不獲蹈舞玉階
無任抃躍屏營之至

賀冊皇后表

臣某言得進奏院狀報五月二十四日制書秦國夫人立為皇后者中宮正位率土同歡臣聞軒轅四星上明于玄象虞舜二女內助於皇風永惟王化之基實繫人倫之本伏惟皇帝陛下誕膺駿命嗣守鴻圖安土定民動循於禮法自家刑國先正於宮闈符沙麓之禎祥取塗山之正嫡蒸嘗是奉既逮事於先朝車服有儀更承顏於長樂典冊大備邦家有光臣以任假列藩獲聞盛

禮伏限恪居官次不獲蹈舞玉堦無任抃躍屏營之至
慰上大行皇帝謚號廟號表

臣某言得進奏院狀報今月六日勅下大行皇帝謚號
神功聖德文武皇帝廟號太宗七日文武百寮詣西上
閤門拜表陳慰者典章大備宗廟永安臣謹按周禮太
師帥瞽而廋所以作匱謚又按禮記大臣素服而郊所
以明天休蓋子不得私其父臣不得私其君爰茲考實
之文用正易名之法洪惟盛典屬在聖朝太宗皇帝知

幾其神惟睿作聖功濟萬物德流八方有經緯天地之
文有尅定禍亂之武錄其行也既如彼定其謚也宜如
此又以為極大曰太有德稱宗懋建鴻名永光清廟禮
官博士討論而無異辭公卿大夫僉諧而合舊典為百
代不祧之主享萬世無疆之休伏惟皇帝陛下以大孝
顯親以至公立法率由茂實誕上尊稱太史之紀國書
有光直筆上公之讀謚冊曾無愧辭終哀且榮愛禮達
孝秩秩之容既肅穰穰之福無窮臣逮事先皇累叨近

侍流落郡政哀號國喪執戟之官既傷於疎賤如椽之
筆空入于夢魂伏限官守不獲奔赴闕庭

乞賜終南山人种放孝贈表

臣某言臣等聞陳蕃之薦五處士名動邦家田歆之舉
六孝廉事光簡冊惟兩漢之制理於三代而同風復有
聘以安車賜之束帛聽其不仕姑務優賢八月奉羊酒
之儀四時致宗廟之胾史之所記代不乏人爰屬昌期
宜興隆典伏見終南山處士种放山林養素孝友修身

既聚學以誨人亦躬耕而事母龐公守道不入襄陽之
城康伯避名永絕長安之市太宗皇帝知其高尚曾示
徵求恐違鶴髮之親未應鵠書之命讓賜錢而不受懸
好爵以難縻今聞放執親之喪貧不能葬棺衾未具宅
兆無歸臣等或忝彼交遊或慕其名節傷哉貧也覩茲
窀穸之憂聞斯行諸豈恡匭匭之救雖共謀分俸而未
若推恩况褒岩穴之賢敢掠朝廷之美伏冀皇帝陛下
特旌素履曲示鴻私少加粟帛之恩俾諧喪葬之禮上

則成先皇之雅意下則揚隱士之清規亦足以激浮競之風勸孝悌之俗所繫者甚大所費者至微比考叔之遺羹一時小惠較鄭均之義穀千古同塗干冒宸嚴臣等無任僭越之至

黃州謝上表

臣某言伏奉去年十二月二十九日勅落知制誥差知黃州軍州事者逼于日限尋即朝辭自後以改葬先臣蒙恩給假幸獲親於遠日免積恨於終天坟杵未停征

輪靡鹽已於今月二十七日到州上訖乍離近侍猶忝
專城循省尤違彌深感泣伏以黃州地連雲夢城倚大
江唐時版籍二萬家稅錢三萬貫今人戶不滿一萬稅
錢止及六千雖久樂昇平尚未臻富庶永言養活亦藉
循良如臣庸愚曷副憂寄謹當勤求人瘼遵奉詔條窒
塞囂訟之民束縛憊狷之吏敢言課最庶免曠遺况當
求理之朝必為無害之政伏念臣叨司帝誥又歷周星
既不曾上殿求見天顏又不曾拜章論列時事入直則

閉閣待制退朝則杜門讀書雖每日起居實經年抱疾不敢求假恐煩醫官自後忝預史臣同修實錄晝夜不舍寢食殆忘已盡建隆四年見成一十七卷雖然未經進御自謂小有可觀忽坐流言不容絕筆夫讒謗之口聖賢難逃周公作鵠鴉之詩仲尼有桓魋之歎蓋行高於人則人所忌名出於衆則衆所排自古及今鮮不如此伏望皇帝陛下雷霆霽怒日月迴光鑒曾參之殺人稍寬投杼察顏回之盜飯或出如簧未令君子之道

消惟賴聖人之在上況臣孤貧無援文雅修身不省附
離權臣祇是遭逢先帝但以心無苟合性昧隨時出一
言不愧於神明議一事必歸於正直愠於群小誠有謗
詞謀及卿士豈無公論以至兩朝掌誥四任詞臣紫垣
最忝於舊人白首不離於郎署以微臣之行已遇陛下
之至公久當辨明未敢伸理今則上國千里長淮一隅
雖叨守土之榮未免謫居之歎霜摧風敗芝蘭之性終
香日遠天高葵藿之心未死仰望旒宸不勝涕洟臣無

任瞻天戀聖省已激切屏營之至

謝加上柱國表

臣某言今月二十日進奏院遞到官誥一通勅牒一道
伏蒙聖慈特授臣上柱國餘如故仍放朝謝者禮成大
祀澤霈具寮豈期謫官之臣亦預策勲之數伏念臣因
緣薄技遭遇昌辰承明四入於直廬才非潤色淮甸三
移於郡印政昧循良方俟黜幽敢期受寵今者伏遇皇
帝陛下躬修禋祀嚴配祖宗率由舊章大賚群后遂令

卽吏亦廁勲官八柱之名實叨於茂渥一麾之任有耀
於專城誓將冰蘖之心上答雲天之施無任感天荷聖
激切屏營之至

謝宣賜表

臣某言今月八日進奏院遞到宣頭一道伏蒙聖慈以
臣先撰元德皇太后謚冊文特賜臣衣著五十疋銀器
五十兩禮畢園陵恩霑論譔伏念臣學慙稽古才不兼
人際會先朝忝塵近侍東里子產累居潤色之司南面

仲弓繼荷分憂之任洎逢續嗣復竊掖垣適當議雲陽之陵定昭成之謚猥承詔命恭草冊文深虞孤陋寡聞難當大手筆事雖經御覽未息兢惶今者謚冊入陵神主祔廟伏惟皇帝陛下孝思罔極克澤下流頒厥篚之綵繒錫中金之器皿捧承靡措蹈舞失容儒冠之榮無以加此孝治之化足能感人惟覺冒榮曷知報効臣無任瞻天荷聖激切屏營之至

起居表

臣某言今月二十五日進奏院遞到御劄一道皇帝陛下取今月五日暫幸河北者黠虜猖狂聖人順動佇殲兇醜永息妖氛伏惟皇帝陛下續嗣鴻圖憂勤庶政戢神武以不殺用人文而化成蠢爾契丹敢干天紀陵越堡障驚騷吏民王師已振於提音帝命尚勞於巡幸契百姓來蘇之望是六師賈勇之時以鎡秣移山壓卵即日蕩平蕃部更無南牧之人守吠塞垣願作北門之狗在茲一舉求服四夷方屬祁寒暫勞天步臣以任居

僻郡地遠行朝捍牧圉以無由仰雲天而積戀臣無任
瞻天望聖激切屏營之至

賀收復益州表

臣某言今月日進奏院狀報雷有終奏收復益州者臣
當時集官吏望闕稱賀并告諭諸縣訖守臣不武戍卒
弄兵暫出偏師果平孤壘謝中臣伏觀益部久樂皇風最
爾王均敢萌逆節蓋災流於分野致盜據於城池伏惟
尊號皇帝陛下斷在睿謨擢茲儒將雖依九伐之法特

開三面之羅尚敢嬰城斯為迷復懼困獸猶鬪之義徵
圍兵必闕之文縱以遁逃自令糜潰盡由聖畧永淨坤
維臣任忝頒條欣聞捷奏無任歌詩樂聖歡呼蹈舞之
至

賀勝捷表

臣某言今月三十日得進奏院狀報今月十二日據夏
州路馬步軍都部署王超延州路馬步軍都部署范延
台等各差入內殿頭高品岑保正入內高品賈繼隆等

走馬齎狀到闕奏兩路大軍入賊界到烏白池會合前
後一十六度掩殺著名蕃賊殺下來慕軍主一十一人
吃羅指揮等二十餘人及殺下蕃賊五千活捉到蕃賊
二十餘人并收到馬二千餘匹奪到衣甲器械二萬餘
事件傷殺却蕃賊不知數目打奪到牛羊老小不少收
到糧米料草窖窳極多並已散與一行諸軍其蕃賊帳
族舍屋並燒毀蕩盡所有蕃賊田禾苗谷並總收刈及
踐踏淨盡其李繼遷與蕃賊並已潰散逃遁其諸路大

軍並百姓已於今月二日並安却迴各歸逐處駐泊訖
皇太子宰臣文武百官於今月十三日入賀者臣當時
集軍州官吏等宣讀告諭望闕拜舞稱賀訖點虜窺邊
王師出塞大殲克醜永息妖氛凡在照臨畢全慶快
謝中
臣聞姬周備塞來則擊之炎漢用兵事不獲已蓋為民
之除害亦有國之常刑言念夏臺古之白翟雖居沙漠
實近峭函最爾繼遷久稽天討養成巢穴召集逋逃逼
脅戎人驚駭王土伏惟尊號皇帝陛下外其夷狄念在

生靈戢堂上之奇兵惜關中之民力以至賜之國姓改
以令名位重察廉官兼保傳而存心反側任性猖狂劫
掠我吏民侵陵我疆境皇威赫怒禁旅奔馳兩路齊攻
三軍合力應兵神速突騎龍驤疾雷無掩耳之期烈火
動燎原之勢大小十六陣斬獲萬千人積甲如丘陵殭
屍滿沙磧發其積聚火其室廬俘牛馬以谷量蹂稼穡
而掃地足使五千深入笑李陵之無功十萬橫行輕樊
噲之虛語而況偏裨斬剽罔有了遺渠魁遁逃僅以身

免賊氣大沮人心已離係于庭闕之前誅乎獨柳之下
止應尅日別聽吉音此皆斷自宸衷出于睿筭遏其橫
議授以聖謨故得帷幄之邊陣圖猶展沙場之上捷書
已來歷考自古帝王料兵之速未有如陛下者也臣去
年叨書密命併直內庭批逆豎之封章屈王言而姑息
未嘗不援毫切齒怒髮冲冠慙無將帥之材實有大夫
之恥今則身居郎署目覩神功感涕忻歡倍萬常品伏
限權司郡印不獲拜舞闕庭臣無任

揚州謝上表

臣某言十一月二十四日樞密院馬遞勅牒一道至滁州伏蒙聖慈就差臣知揚州軍州兼管內隄堰橋道事替董儼仍故放朝謝取便路乘遞馬發赴移任所者臣已于十二月四日到揚州上訖祇奉朝命初權藩服分憂任重謫官心寬感恩而涕泗無從省已而兢惶失次中伏以禹別九州斯為奧壤唐分十道是曰大邦控淮海之津梁會東南之漕運當聖主求賢之日親王領鎮

之初宜擇才能俾人繁劇豈臣愚昧而所克堪伏念臣頃以藝文獲塵科第三館兩制遍歷清華千載一時別無媒援由是上惟奉主旁不忌人比因直言頻至左官去年自禁中出職滁上臨民黽勉在公憂虞度歲鬢髮漸白眼目已昏但以行年未高不敢求退明代難遇猶思報恩顧惟善政之蔑聞豈望鴻私之曲被今者伏蒙尊號皇帝陛下擢從小郡權蒞大藩雖放棄之臣君恩未替而要冲之地使命孔多微臣素乏家財本州元無

公用恐因供億別掇悔尤冀聖心之察微免衆口之騰
謗此外竈當勵力豈敢曠官况揚州雖號藩方無多戶
口凡干場務皆有使臣臣在其中提振而已至于決斷
詞訟督責賦租持以無私必期集事今緣奉詔急速所
以不敢羈留庶于歲時之間別求散慢之地舉頭見日
空知京闕之遙白首為郎甘老江湖之上伏限權臨郡
政不獲躬拜天庭無任

請撰大行皇帝實錄表

臣某言臣聞二帝三王之道無尚書則泯而不見戰國秦漢之事無史記則滅而不傳能使後之視今猶今之視古者書史是賴

謝中伏

以大行皇帝功濟萬物道高百

王誕敷皇謨勤恤黔首憲章軍國之務經制郡縣之權故得百萬之師如臂使指億兆之衆推心致腹而又禮樂刑政之盛聲明文物之光煥乎爛然有足稱述附于二十一年行事而王道備矣伏惟皇帝陛下以奉先之孝副知子之明紹膺丕圖惟克永世柩前即位天下宅

心社稷人神罔不依附華夏蠻貊罔不駿奔斯乃先帝之貽謀得陛下之聖嗣乾坤交泰日月重光歷考近古立儲闡承帝位未有如我朝之盛者也臣愚以為宜撰大行皇帝實錄垂之不朽况盛德大業簡冊俱存鴻儒碩生臺閣皆是豈臣孤陋敢有覬覦然念臣太平興國五年徒步應舉再就御試遂登文科服勤州縣揚歷四考先帝採摭紳虛譽自長洲令徵為左正言帖直史館明年轉左司諫知制誥出入中外十有三年進不因人

退無顯過永惟知己之至未得殺身之地今陵寢有日
論撰是資倘得措一辭于帝典之中署一名于國史之
後臣雖死之日如生之時至于褒善貶惡之文編年紀
傳之例備嘗探討粗見指歸况端拱元年春季日厯是
臣編修如蒙帝俞不辱君命臣無任懇悃之至

謝弟禹圭授試銜表

臣某言臣禹圭昨差押本州賀登寶位進奉伏蒙聖慈
特授將仕郎試秘書郎者千年遭遇九族輝榮

中伏念
謝

臣出自孤貧猥叨班列雖累居近侍而未免食貧言念
禹圭臣之母弟素無文性早使專經重以先臣惜其幼
子本期擢第以慰慈顏自後住舉六年丁憂三載漸及
強仕未有出身今者伏遇皇帝陛下纘嗣寶圖誕敷文
德凡居守土之任義合駿奔因命在原之親入修職貢伏
蒙陛下舉先朝之故事推出震之殊恩俾列官常仍居讎
校起家之調曲荷於生成報國之心同期於死所伏限
郡印不獲蹈舞玉階臣無任感天荷聖激切屏營之至

謹奉表陳謝以聞

賀聖駕還京表

臣某言今月十六日進奏院狀報正月二十三日大駕還京者犬戎逃遁鑾輅凱旋中謝伏惟尊號皇帝陛下奉

承祖宗威懷戎狄但懋守文之德靡矜神武之功最爾
林胡無名內侮蜂屯烏合鼠竊狗偷必想邊民奮挺以
毆攘亭長持繩而繫縛豈勞車駕遠涉山川陛下念二
聖臨朝每經營於河朔屬三時不害乃巡幸於沙場存

問耆年勞來疆吏有征無戰陳詩觀風邊人識龍鳳之
姿胡馬避虎貔之衆昔周宣薄伐獫狁深入太原漢武
斥逐匈奴遐臨瀚海頗為勞弊尚著聲詩曾未若陛下
仰順天時俯從人欲出狩適當於冬隙班師未廢於農
祥端居紫宸飲至清廟穀雨方霈春華正繁捧觴長樂
之宮錫宴上林之苑皇歡大洽天步永安易曰聖人以
順動則刑罰清而民服孫子曰不戰而屈人之師善之
善者也其是之謂乎臣方在謫官無由扈從既不得草

頡利可汗之露布又不得答冒頓單于之慢書當文士
有為之時處山川無用之地迎鑾莫遂望闕彌深臣無
任歌時樂聖

謝加朝請大夫表

臣某言今月十三日進奏院遞到勅牒一道中書劄子
一封伏蒙聖慈以臣預修太祖實錄特授臣朝請大夫
仍賜絹五十疋銀五十兩者陞級清崇錫賚優厚恩生
望外事繫宸衷仰戴寵光伏增戰越臣中謝伏念臣素無

實望久玷清華訓誥典謨罔知體要春秋禱祝豈識指
歸去歲伏遇尊號皇帝陛下詳觀國書追念始祖顧復
不祧之廟光揚納麓之勲以為自昔編修或多漏畧永
懷丕烈深軫孝思謂漢祖元功立紀于武帝之世神堯
實錄重定于高宗之朝爰詔近臣再編茂實臣叨膺是
選尤愧非才尚賴宰臣李沆監修錢若水總領其職臣
則討論遺事潤色舊文始則合秦趙世家得國姓之根
本考唐杜氏族見太后之源流凡所改更皆有按據庶

彰帝業以副天心方施汗簡之勞遽有分符之命無由
別白但積憂危加以年鬢漸高郡封甚僻野鳥閒暇潛
窺賈誼之容江魚噉喁欲噬靈均之骨未知何日再覩
天光豈謂大典初成群賢進御陛下以臣曾施翰墨曲
記姓名俾進階資復援恩例絲綸渙汗金帛輝華州民
改觀謫官增氣領郡城而兼史氏何異唐賢奉朝請以
為大夫榮同漢制非小臣稽古之力乃陛下好文之心
涕泗縱橫亂於縻綆神魂飛越若在煙霄唯知遭逢曷

可報効然念臣業文之外蔑有器能知命之年別無嗜
好才思未減筆力尚雄馳于文翰之場猶能識路責以
循良之政恐悞分憂倘用所長期不辱命臣無任

小畜集卷二十二

欽定四庫全書蒼要卷一萬四千一百四十八

集部

小畜集卷二十三

宋王禹偁撰

表

賀冊尊號表

已下皆代趙侍中作

謝降御札表

賀雨表

賀雪表

賀罷謁廟大禮表

賀御樓肆赦表

慰公主薨表

乞歸私第養疾表

為乾明節不任拜起陳情表

乞差官通攝謁廟大禮使表

求致仕表

四首

讓西京留守表

四首

謝降御劄并宰臣就第傳宣不允陳讓留守乞

候病愈日赴任表

謝許肩輿入內表

謝宣差長男送赴西京表

謝宣旨令次男西京侍疾表

賀冊尊號表

以下皆代趙侍中作

臣某言伏奉去年十二月二十四日批答允百寮所上尊號內四字今年正月一日御朝元殿受冊禮畢者日新盛德讓茂實而不居天啟群心上尊名而得請事光

簡冊慶洽華夷

謝中

伏惟尊號皇帝陛下受天靈符作民

司牧元元本本咸臻富壽之鄉戰戰兢兢未減焦勞之
念一昨特頒鳳詔盡省鴻名謙冲之道彌光推戴之心
安仰百辟請仍於舊貫睿眷不迴於新名玉章別上宸
聰見納尚以為法天之義可以體剛健而奉高明崇道
之名可以守虛无而務清淨見帝皇之自下却文武之
大功俯順萬邦作程百代粵茲元日誕受徽章冊鏤乾
文愈見流謙之道禮成帝籙更隆卜世之基臣擢列上

台得觀盛事伏限未任拜起不獲稱慶朝堂

謝降御劄表

臣某言今月二十二日夜伏蒙聖慈特降御劄

云

者

驕陽作沴乃相臣調燮之懋乙夜飛文見聖主焦勞之
旨引過咎以歸已教刑政以留心捧讀驚慙不遑啓處

中伏惟尊號皇帝陛下為民父母受天聰明覃恩而已

謝滅妖星轉禍而尚憂時雨側身修行自符雲漢之詩旰
食宵衣莫有華胥之夢特形宸翰備見天心恨不自作

犧牲何止靡愛珪璧諒至誠之所感致甘澤以非遙臣
備位台司親承睿旨當歲大旱多慙傳說之才謂天蓋
高必聽湯王之禱未蒙冊免尤愧搢紳而又誨以政刑
敢不勤于夙夜少助憂心之意庶成澍雨之期伏限脚
膝未痊不獲拜謝闕庭

賀雨表

臣某言伏覩今日甘雨大降宰臣呂某等便殿稱賀
者自秋以來時雨不降遇災而懼至誠爰禱於上玄有

感則通甘澤忽霑於下土豐登有望朝野同歡

中謝伏惟

尊號皇帝陛下七政咸齊五行為質寅畏昊穹之命焦
勞刑政之源一昨妖彗告災豐年失望宿麥播而未茁
旱雲垂而不霑陛下靡愛斯牲偏走羣望降廷臣而決
獄御便殿以錄囚御筆摛文乙夜引萬方之罪青詞瀝
懇經旬祈五福之宮惟德動天而天不違至誠感神而
神授職向夕而月離于畢崇朝而雲上于天散絲徧洒
於焦枯比屋重興於耒耜豈止小康之兆將書大有之

年堯眉舒八彩之顰免貽臣辱舜樂復九成之奏大悅
民心凡在含生同知大賚臣為霖寡術和鼎備員方期
冊免之文以塞變調之咎處台司而愈愧荷聖感以彌
深伏限未任拜起不獲稱慶朝堂

賀雪表

臣某言伏覩今月九日臘雪應時宰臣呂某等便殿稱
賀者伏以臘者四時之暮所以成歲功雪者五穀之精
所以滋農畝寔上玄之垂祐表聖主之憂民凡在昌朝

共欣嘉瑞

謝中

伏惟尊號皇帝陛下勤勞庶政欽順天時

因百姓以為心思躋壽域慮一夫之不獲常若納隍而
自秋徂冬密雲不雨陛下念兆民之稼穡憂七廟之粢
盛徹金石於堯軒減葷羶於舜甑而又京師之內鰥寡
之徒大頒金帛之資用拯饑寒之累靡神不舉有感則
通遂令六出之祥大副三農之望連宵委積遍野霑濡
彰聖德以彌光書有年而無愧臣方居假告忽覩休祥
雖慙調燮之功但樂豐登之望

賀罷謁廟大禮表

臣某言伏覩御劄示諭内外文武百寮以彗字之妖特
罷八月二十四日謁廟大禮仍擇日御丹鳳樓肆赦者
清廟陳儀玄穹示誠引萬方之罪皆在聖躬退三舍之
妖佇光帝德凡居覆幬盡仰昭明謝中伏惟尊號皇帝陛下
寅畏上玄祇嚴列聖垂象忽呈於恠異惟馨罷薦於
祖宗洒宸翰以飛文出綸言而引咎仍行赦宥用答穹
昊九土編氓盡聞哀痛之詔三邊戍卒頓減歌吟之聲

佇見玄德升聞至誠感應五緯變連珠之狀戴耀乾文
萬邦傾執玉之誠同扶帝業臣久叨輔弼備熟憂勤慙
非伊呂之致君但仰禹湯之罪已歡欣抃蹈倍萬常情
賀御樓肆赦表

臣某言伏覩今月某日皇帝御丹鳳樓大赦天下者謫
見上玄乃降責躬之詔澤流率土仍推作解之恩凡在
照臨同深慶賴謝中伏惟尊號皇帝陛下順考古道觀乎
天文有年將謝於祖宗玄象忽垂於躔次遂停吉禮用

慰咎徵慮庶政之闕修欲普天而流惠樓開丹鳳大昭
引咎之誠竿揭金雞咸與自新之路幽明靡間罔罔皆
空人心已作於頌聲天道頃迴於和氣佇觀符瑞用答
憂勤臣年在衰殘功虧變理冊免尚稽於舊典禦灾但
仰於新恩愧畏兢虞罔知所措

慰公主薨表

臣某言今月某日得進奏院狀二十一日某國公主薨
者雲愁魯館風咽秦簫驟驚轡以颺馳慘龍頭而雪泣

中伏以某國公主自天鍾秀稟聖含華聲詩早詠於肅
雍選尚遂從於釐降行舅姑之禮克表人倫宜公侯之
家誕彰婦道豈謂瑤臺促白玉樹先摧星沉而婺女難
留月晦而嫦娥不見伏惟尊號皇帝陛下悲深天性痛
極皇枝歎媯汭之逝波空驚長往望沁園之荒土无復
歸寧凡在人臣共增悲悼臣限拘留務不獲陳慰闕庭
乞歸私第養疾表

臣伏念臣久廢常朝將臨聖節紫宸咫尺難獻壽以捧

觴黃閣優閑但備員而調鼎不歸私第實玷公朝是以
輒述懇誠形于章奏伏蒙尊號皇帝陛下曲垂教諭未
賜聽從念疇昔之遭逢存終始之寵遇聖慈雖厚公議
難安况廊廟具瞻台衡重務固當夙夜匪懈朝夕論思
豈有半年之間殊无一拜之禮外論恐傷於冒寵私心
未免於懷憂伏望皇帝陛下俯察哀殘更容假告庶藥
石之有效俟筋骸之稍康盡瘁匪躬尚更期於晚節懸
車告老敢輕議於明時倘遂允俞不勝懇願

為乾明節不任拜起陳情表

臣伏念臣向嬰羸疾久免起居顧聖節以將臨候天顏而尚阻在百辟具瞻之地合展禮容當千官獻壽之時未任拜起載循哀朽但積兢憂中謝伏惟尊號皇帝陛下

甲觀儲祥華封祝聖萬邦玉帛俱傾就日之誠五等公侯共樂後天之壽凡居覆幬孰不禱祈況臣首冠台司曲承天睭曳履方艱於步武捧觴實阻於歡呼有禮則安考格言而是懼無德而祿召厥疾以攸宜空存善禱

卷二十三
之心願恕不良之足筋力為禮雖臨几杖之年股肱惟良深愧搢紳之籍臣無任

乞差官通攝謁廟大禮使表

臣虔傾丹懇仰達紫宸再三雖黷於聖聰萬一冀迴於天睠伏念臣遭逢昌運忝竊台司三十年將相之權周旋備位一千載君臣之分終始無渝而自秋夏以來脚膝無力免常叅於紫殿預大政於黃扉伏遇尊號皇帝陛下告謝豐登祇嚴宗廟既列三台之首合居五使之

先顧筋力之不支慮趨蹌之失度輒伸悃悃冀免遺差
豈謂陛下雖念暮年猶敦後事猥將大禮責在老臣加
以中使太醫旁午於道路王言御劄稠沓於門庭既睿
旨之丁寧豈自圖於安逸受已行之命焉敢固違在臨
事制儀尚期通攝是敢預陳危懇上禱宸嚴庶於行事
之晨免致乖儀之咎

求致仕第一表

臣某言臣聞知進知退賢達之格言有始有終君臣之

大義將染乞骸之疏猶馳就日之魂冀仁主之憫嗟遂

老臣之休退

謝中

伏念臣比乏宏才且非世胄鄧仲華之

素望不過功曹岑文本之初心止于縣令偶以遭逢景

運扳附先皇擢自賓從驟居相輔捐軀誓命不後他人

任重才輕終無成績洎盟津之出將遇代邸之興王駿

奔北闕之前備佐東宮之列臣此際已能知止便誓終

焉豈期陛下軫念青氈重升黃閣但奉明文之教令曾

無啓沃之謀猷邇後陛下察以兢持均其勞逸連鎮襄

鄧暫遠唐虞節旄久竊於寵榮寒暑漸成於衰甦前歲
幸遇陛下躬事上帝親耕千畝之田老臣位忝諸侯合
預五推之禮請朝天闕尋奉帝俞得伸助祭之誠實有
分司之望陛下過私天眷復列上台既責重以位高果
積憂而成病今春始于微恙遂至沉疴陛下終賜哀憐
多方治療痊平未幾步履猶艱自茲特免常朝仍司大
政無一言以俾聖聽無一拜而覲天顏在中書則省吏
扶行羞看朝士歸私第則鳴騶前導恥見都人已為廢

疾之身曷稱具瞻之地近因歲暮轉覺形羸雖云告假之中仍列鈞台之上存問頻勞於聖慮優容實玷於公朝况宰臣一月之俸金乃下位數年之祿食君恩雖厚數有國之彛倫內府雖豐耗生靈之膏血苟不思止但冒寵光豈惟辜負聖知直恐招延鬼瞰伏望陛下聽其告老惠以歸全庶于瞑目之前少遂安身之計示君恩之有卒使賢路之無妨必也辭榮許歸西洛幸而未死獲見東封免令就木之年更取伐檀之刺尚慮陛下過

存念舊便斷來章雖犯嚴誅當期必遂限以尚艱步武
不獲躬拜朝堂謹遣次男六宅使承煦詣東上閤門拜
表陳乞以聞

第二表

臣某言今日拜章上閤告老懸車優詔未俞雖增寵
遇殘年無幾須至哀鳴縱獲戾於違天冀退身而得地
中謝臣聞葛亮蜀之名相以二十罰而傷神裴度唐之鉅
賢始四十歲而髮白或成衰促蓋積憂虞況臣非武侯

之才能無晉公之智略然以遭逢先帝際會聖君塵重
位者三十年處浮生者七十載雖無功名報國常以畏
慎周身衰老若茲死亡無日未解弼諧之任頗傷公共
之朝但冒寵於三台終取笑於千古是以懇求致仕適
合舊章陛下曲存始終過有敦諭聽自天之成命雖沒
地以知榮其如老病彌加死期非遠况廟堂三入貴極
生人尸素萬錢罪招陰譴與其速之以斃曷若優之以
生伏望陛下惠以考終致之散地冀延餘息尚見明時

感聖主於生前從先臣於泉下幽魂無愧朽骨有光區區之誠實望于此

第三表

臣某言臣屢上封章請還朝政繼蒙批答未賜帝俞七十懸車于禮文而非遠再三則黷考易象以懷憂念老病之日加冀皇慈之見憫中謝臣聞老氏玄言誠于知足

箕子洪範福尚考終臣雖至愚竊慕茲義況才非王佐位極人臣出則擁上將軍之旗鼓貴居方面入則佩大

丞相之印綬首冠台司三代有贈官諸子居貴仕俸祿
錫賚聚之則何啻萬金官爵階勲數之則無非一品日
有秩酒月有食錢奉此一身已踰二紀外不能出奇畫
策廓氛祲而偃干戈內不能阜俗安人救惇嫠而躋富
壽玷聖朝之公道為陛下之私人齒髮衰殘形骸病弱
此而不退是謂無厭向者祚慧忽生亢陽斯久天怨神
怒實為老臣引咎責躬飭勞聖主今幸時雪大降豐年
有期多慙燮理之功全賴文明之感陛下復頒詔旨盡

去尊名臣則兼八字之功臣處三台之上列當萬乘焦
勞之日為一生尸素之人縱免國刑必招陰責臣所以
號泣求退朝夕不安者正為此也伏望陛下察由衷之
危懇行冊免之時文庶延風燭之年獲盡雲龍之分若
一旦溘先朝露尚秉洪鈞則埋骨泉臺幽魂負愧書名
國史後嗣何觀瀝懇披肝期于得請

第四表

臣某言自今月五日至十四日三上封章懇陳致仕伏

奉十七日批答不允令斷來章者伸告老之誠實當暮齒拒已行之命合受常刑與其冒寵以招殃不若違天而獲戾

中謝

臣聞上天之育萬物各使得其時是以春則

發生秋則肅殺示有成也明君之馭百官各使得其所是以壯而入仕老而懸車明有終也敢徵斯義以道危誠伏念臣邁疾彌深殘年非永聖主不能載造神醫不能有瘳自料此生必難報國惟當明代早遂退身繼有哀鳴固非飾詐况去年十二月二十三日陛下幸臣私

第見臣病容以至金口憫嗟重瞳霑泣臣此際潛忻得
退志在不疑始望一表見俞豈謂三章未允曲形敷諭
過念遭逢雖戀聖明其如病廢臣今日暮途遠居常待
終氣羸則藥劑無功手顫則粥杯難把謂出納惟允臣
則蹇澁于言詞謂股肱惟良臣又艱難於步履衰殘之
狀備對天顏尸祿之愆累煩聖聽實求歸骨詎敢要君
鄙志不移有死而已

讓西京留守表

臣某言自今月五日至十五日四上表章懇求致仕伏
覩二十一日內降白麻伏蒙聖恩授臣守本官兼中書
令行河南尹兼功德使充西京留守者繼上封章乞歸
骸骨未行冊免忽用保釐顧殘年而氣若尸居聽成命
而魄疑天奪微軀殞越舉族憂虞中謝臣聞掌王八柄是

為生殺之權分務兩都實總居留之地顧惟老朽曷稱
崇高伏念臣出自孤寒本非俊傑久處秉鈞之任止因
開國之期常依託諸侯三十五未諧釋褐洎遭逢明主

六十九尚占台司固無經國之謀猷但享逼身之富貴
上辜聖德果有天殃自邁沉疴已踰新歲啓手足而能
餘幾日為股肱而深負明時是以泣血濡毫呼天抗表
願罷萬錢之俸預營五尺之墳盡是哀鳴固非飾詐豈
謂陛下過私天眷復降徽章別開苟令之池俾守周公
之宅荷君親終始之分近古殊無守宮闕宗廟之司非
才莫可況臣手不能運足艱于行苟聞命以不辭是捨
輕而即重前求罷相皆是欺天不惟受君子之誅兼恐

取樵夫之笑有死而已臣不敢當伏望陛下憫念桑榆
寢停綸綍放歸私第明告公朝則老臣知止之榮沒而
不朽陛下有終之惠于義何如伏表叩頭淚血俱下

第二表

臣某言今月某日蒙恩授臣某官臣當日上表陳讓伏
奉批答未允者留司重任垂死殘年聞命不遑拜章陳
讓未迴宸眷恐速天殃夙夜以來神魂飛越謝中伏念臣

去年春季即染沉疴今歲正初方求致仕非不眷戀明

代蓋憂逼近死期述度德量力之心減尸祿素餐之咎
所望盡停厚俸高謝台司隨太平之老農作皇家之舊
相是為大願夫復何求豈期陛下特委居留仍加官秩
改功臣之懿號付大尹之劇權雖荷皇恩實乖素望且
念臣之富貴天下共知臣之衰羸陛下具見肯因休退
復取寵榮况西都事繁中分邦政留守祿厚十倍宰臣
臣若受之是無厭也豈止冒榮於當世亦將取笑於後
人平生無致主之功臨死有要君之罪此臣之所必不

為也若以拒違成命冒犯嚴誅視死如歸期不奉詔伏望陛下存退人之大體割念舊之小慈賜以安車期于就木雖死之日猶生之年

第三表

臣某言臣自聽宣麻載陳讓表伏奉答詔令斷來章顧老疾之嬰纏荷聖恩之稠沓因辭榮而就祿是冒寵以沽名泣血慙魂不遑啓處

謝中

伏念臣去年抱病久在中

書上有萬乘聰明下有三臣輔弼臣安則署勅困則高

眠尚多虛羸不任來往而況兩京分務百職具存七世之廟甚嚴萬夫之政斯在既非卧理之地尚增尸祿之尤且三千貫之俸金數百家之賦調奪其膏血奉此哀殘雖曰優臣以恩乃是速臣之死興言及此苟活何為臣又視前代退人自有常禮或有師事之舊或以定策之勲亦不過賜以千金與之駟馬而已臣之富貴止是遭逢有位無功既老且病放歸私第何負于臣豈煩朝廷過作禮數伏望陛下容其告老察以由衷俾諧知足

之心盡寢已行之命朝退夕死臣無恨焉

第四表

臣某言臣伏奉今月某日第三道批答不許臣陳讓恩
命令斷來章者上言則是拒命受寵則是要君憂惶失
圖進退無據謝伏念臣累陳危懇未動宸衷實慙老病

之身不稱保釐之任萬端憂悸三表哀鳴陛下累降綸
言兼貽御劄且云開國勲舊惟卿一人又云頤養洛陽
事光青史伏讀聖語泣顧殘骸恨不能追已往之年華

換已廢之筋力奔走上道應副天心其如步履艱難言
辭蹇澁不求致政是謂貪榮安有始則讓三百貫料錢
終則受三千貫月俸必若均于庶吏可給數百員分于
六師可養數千輩或使安民布政或令禦寇備邊割老
臣之私恩成陛下之公道亦恐增臣微福減臣餘殃因
之剝活數年必得載見萬乘若須令赴任不許罷官尸
素轉多憂勞速死恐無益也適足苦之伏望陛下思一
物失所之言察匹夫不奪之志寢茲成命俾遂初心則

長往九原免有冒榮之恥更生一日亦蒙載造之恩

謝降御劄并宰臣就第傳宣不允陳讓留守乞候
病愈日赴任表

臣某言今日伏蒙聖慈特降入內小底押班韓守英
載賜御劄當日晚宰臣呂某已下至臣私第奉宣聖旨
重疊示諭兼再賜批答不允臣陳讓恩命令斷來章者
宰臣諭旨中使傳宣宸翰丁寧雖難封執殘骸哀慙實
不支持若伏枕堅拒於君恩飛章更煩於聖聽為臣之

道實不自安稍俟有瘳以膺成命謹當徧求良醫精療
沉痾懇願未間憂惶失次

謝許肩輿入內表

臣某言今日日准樞密院劄子奉聖旨許臣過清明節
選日辭朝仍令乘轎子於崇政殿入見者老病衰羸聖
慈憫惻察其足疾聽以肩輿實君父之殊私非人臣之
常禮昔蔡義授經於宣帝則兩吏扶以趨朝裴寂納命
於太宗則三衛昇之入覲臣無此勲舊有此寵榮自知

殺身無以報主兢惶涕泗不知所裁

謝宣差長男送赴西京表

臣伏奉宣命差臣長男左羽林軍大將軍承宗送臣赴西京者自天有命舉族知榮慰其父子之情益見君臣之分伏念臣比慙衰老未遂歸休明君重委於保釐方憂曠位長子幸叨於環衛合預常叅陛下輟自班行許隨行李出于聖念實耀私門岐路有光室家感泣獨親獨子既有玷於公朝盡孝盡忠豈敢忘於家訓永言感


遇空極涕洟

謝宣旨令次男西京侍疾表

臣某言今日日樞密院送到宣頭一道付臣次男某令
隨臣赴任西京侍疾仍不落請受者君親厚遇父子偕
行祇荷寵榮彌增感泣臣近以將之洛邑入覲堯堦少
傾戀闕之心併寫感恩之抱沐聖君之發問許幼子之
侍行不落班行仍支俸給實非常例並出特恩想暮齒
以知榮顧私門而積耀此蓋陛下義敦天性恩厚孝思

念黃髮之哀羸俾彩衣而侍養老夫耄矣罷相輔而忝
居留童子何知奉晨昏而兼內職唯於忠孝以誓子孫
過此以還不知所措

小畜集卷二十三



總校官庶吉士臣張能照

校對官中書臣金光悌

謄錄監生臣胡金芝